

Ûn toc tradiziun our da fier e chürom

Chi chi ha ils ultims decennis festagià Chalandamarz a Lavin tilla cugnoscha dal sgür: La plumpa marcanta da la famiglia Padrun, daspö passa 40 ons la plü gronda i'l cortegi dal Chalandamarz a Lavin ed intant vairamaing fingià bod üna part fixa da l'üsanza.

MICHAEL STEINER/FMR

Ouravant va il patron o la patruna culla scrola e'l chapè da fleuter—e jura segua l'uffant culla plumpa dals Padruns. Quai sarà plü o main daspö 45 ons uschea, almain nu's regordan neir ils Padruns chi füss stat oter, cha ün'otra plumpa co lur füss statta il plü davantvart pro'l cortegi.

La plü gronda plumpa dal Chalandamarz a Lavin: 9.7 kils greiva, da fier battü cun üna glüschur d'or e la tschinta decorada cun ün muoster da flommas gels, orandsch e cotschen. «Dürant l'on picha quella quia pro nus d'adaint üsch e per Chalandamarz tilla pigliaina giò e pulin», quinta *Duri Padrun* chi maina a Lavin in quinta generaziun il bain parail da sia famiglia. «Eir eu n'ha gnü in meis ultim on da scuola l'onur dad ir cun quella plumpa ouravant. Chalandamarz n'ha adüna pläschü—ed eir hoz n'haja amo gust.»

Ûn regal famigliar

La gravüra sülla fibla da la tschinta indicha l'istorgia da la plumpa: «Jachen Padrun / 19-Lavin-80». *Marta Padrun* tilla vaiva regalà avant 45 ons a seis hom. «Per che occasiun nu saja gnanca plü», quint'la. «Forsa simplamaing our da plaschair.» Il muoster sülla tschinta ha'la quella jada cusì svesa.

Vairamaing d'eira ün regal per ir cullas vachas ad exposiziuns e fairas. «Ma da prüma davent d'eir la eir in servezzan a Chalandamarz», as regorda *Duri Padrun*. O lura eir per la festa da dschelpcha, cur cha las vachas tuornan decoradas giò da l'alp. «Ma hozindi nu's metta plü sü las s-chellas, schi's va cullas vachas ad exposiziuns o fairas», disch il paur. «E dschelpcha nu festagiaina quia a Lavin neir plü. Uschea vain la plumpa dovrada be amo per Chalandamarz.»

«Vairamaing schon alch special»

Quist on es *Livio Padrun*, il figl da *Duri*, il plü vegl scolar a Lavin e cun quai il patron da Chalandamarz. L'ultim marcür in favrer s'inscuntran las scolaras ed ils scolaras da Lavin e Susch il davomezdi per ramassar las plumpas e s-chellas. *Livio* tilla scumparta lura tenor grondezza tanter ils uffants: «Nus ans mettain sü in lingia tenor etè e lura guarda chi chi tschüffa che s-chella.»

Da Susch vengnan eir lapro duos plumpas plü grondas co quella dals Padruns, ma quella vengnan dovradas be pel Chalandamarz a Susch. A Lavin as scuvrischa i'l cortegi il plü davantvart amo adüna quella cul muoster remarchabel sülla tschinta. «Quist on tilla portarà ün consolar da mai», declera *Livio Padrun*. «Ed eu sper cha quai resta amo ün temp uschea cha quella es il plü davantvart.»

Inveza da portar üna plumpa sventulescha el svesc sco patron da Chalandamarz la scrola e dirigia il cortegi tras cumün. Quel düra a Lavin ün ter zich plü lösch co in blers oters cumüns, da la bunura las ot fin vers las tschinch la saira. Da chasa a chasa van ils uffants per s-chatschar sclingind e chantond l'inviern.



Il patron cun sia plumpa: *Livio Padrun* culla plumpa da seis bazegner.



Amo adüna la plü gronda i'l cortegi da Lavin: la plumpa dals Padruns.

FOTOS MICHAEL STEINER

Portar intuorn e far sunar ün di inter üna plumpa da bod desch kils—na güst üna trivialità. Per schlioger quella lavur as müdaivan ils uffants dürant blers ons giò: Il terz vegl portaiva l'avantmezdi la plumpa, il seguond vegl sventulaiva a la fin dal cortegi la seguonda scrola. Ed il davomezdi gniva müda. «Ils ultims ons nu vaina plü fat uschea, ma eu crai cha quist on müdarana darchea giò», disch *Livio Padrun*.

El svesc nun ha a Chalandamarz mai portà la plumpa da seis bazegner—ils ultims ons d'eira l' massa giuven e quist on e'l apunta il patron chi nu porta ingüna plumpa. «Ma eu tilla vez mincha di», disch *Livio Padrun*. «E vairamaing esa schon alch special, saviond chid'è la prüma plumpa pro'l Chalandamarz.»

Model ed alfordanza

Da quella opiniun d'eiran sco chi para eir quel chi vaivan fat l'equipamaint pel film «Schellenursli» da *Xavier Koller*. *Marta Padrun* quinta cha lur plumpa d'eira quella jada il model pell'atrappa chi han zambrä pel film. E davo passa quatter decennis servezzan a Chalandamarz muoss'la eir segn da suradöver. «Eu tilla n'ha stuvü buglir», quinta *Duri Padrun*. «Davo tants ons ha'la cumanzà a sfender.» Ma intant st'ala be listess amo in servezzan minch'on als prüms marz. «Pro nus in famiglia han las s-chellas schon tradiziun», disch *Marta Padrun*. «Per mai es quai ün'alfordanza fatta a man, regalada a meis hom chi nun es plü.» Ed ün'alfordanza eir per tuot quellas e quels chi d'eiran i'ls ultims decennis uffant a Lavin e chi han là fat part a Chalandamarz.

SCUOL

Il god as müda ed uschea eir la cunvegna

Mincha quatter ons vain la cunvegna da prestaziun adattada als bsögn dals reviers forestals cumünals. A Scuol daja per exaimpel da nov ün silvicultur dapli.

Il chantun Grischun ha decretà la nova cunvegna da prestaziun per la chüra e survaglianza dals gods. In singuls reviers forestals daja ün augmait dal pensum, ma guardà sur tuot il chantun Grischun lavuraran sco fin uossa var 90 silviculturs.

Las sfidas pels forestals restan però eir in avegnir grondas, impustüt il müdamaint dal clima fa fastidi als gods grischuns. Tenor il silvicultur chantunal *Urban Maisen* dan in futur las preparaziuns in vista a la müdada dal clima sco eir las sfidas in connex cul magliascorzas gronda lavur. El disch: «La nova cunvegna da prestaziun regla ouravant tuot il sistem d'indemnisaziun tenor la prestaziun actuala da mincha revier cumünal dal Grischun.» *Urban Maisen* agiundscha cha silviculturs cumünals sun persunas fich ferm integradas in lavurs cumünals chi nun han per part da chefar cul pensum forestal. E quai es tenor il silvicultur chantunal ün'ulteriura sfida per l'avegnir.



Per *Antonin Hugentobler*, manader da l'uffizi forestal da Scuol, esa important cha'ls silviculturs nu sajan be in büro, dimperse eir in gir i'ls gods.

FOTO RIR

Dapli silviculturs a Scuol

Il cumün da Scuol ha la plü gronda surfatscha da tuot la Svizra. Perquai es gnü augmantà il pensum per üna piazza ed in futur saran impiegats a Scuol trais silviculturs ed üna silvicultura.

Pel manader da l'uffizi forestal da Scuol, *Antonin Hugentobler*, esa necessari d'avair il temp per far uossa üna buna planisaziun. El disch: «Id es da far üna buna lavur, ouravant tuot per las prosimas generaziuns. Fin uossa s'esa permanent be vi dal stüder il fö e far las lavurs las plü importantas.» Per *Antonin Hugentobler* esa perquai da gronda importanza cha'ls silvicultur nu saja be in büro sco administratur. I saja percenter important cha'ls silviculturs sajan eir in gir i'ls gods ed observan co cha la natura as müda per pudair imprendir our da quistas observaziuns. (rtr/fmr)

SCUOLA DA SCRIVER IN ENGIADINA

Prelecziun finala a Sent

La «Schreibschule Sent—Scoula da scriver in Engiadina» es fin-gie activa daspö tschinch ons ed i's tratta da la prüma scoula da scriver creativ in Engiadina. Ella vain manada da la scriptura *Angelika Overath* e dal scienzià da litteratura ed essaiist *Manfred Koch*. In cuors sco «Inspiration Sent. Schreiben nach der Natur», «Gedichte lesen. Schriften Gedichte» o «Rainer Maria Rilke und die Schweiz» vengnan las partecipantas e'ls partecipants animats da scriver lur agens texts. Sco cha la Scoula da scriver in Engiadina scriva in üna comunicaziun daja eir divers experiments litterares cun scriver in duos linguas ed uschea vengnan adüna darcheu creats vers rumantschs sorprendents.

«Cun ün rispli nun est sulletta»

La prelecziun finala tradiziunala sta tuot il titel «Mit einem Bleistift bist du nicht allein—Cun ün rispli nun est sulletta» ed ha lö quista dumengia, ils 28 marz 2025, da las 15.00 fin las 16.30 illa Chasa Misoch a Sent. 18 auturas e quatter auturs da Basilea e Berlin, Soloturn e Sempach, Puntina e Tumein, Friburg e Weinfelden preschaintan lur texts prediles in prelecziuns cuortas. A chaschun d'ün aperitiv davo la prelecziun daja eir l'ocasiun per inscunter e baderladas cun las auturas e'ls auturs. (cdm/fmr)

SAMEDAN

Referat davart l'utschè da l'an 2025

Già per la 25evla vouta ho l'organisaziun BirdLife Svizra tscherneü üna spezcha d'utschè scu uschè da l'an. Che chid'è però nov quist an: BirdLife Svizra nun ho lascho tschermer l'utschè da l'an 2025 d'in gremi d'experts, dimperse da la populaziun. Tenor üna comunicaziun s'hau partecpedas var 12000 persunas a la tscherma ed a la fin ho il gulacotschen fat la cuorsa. Il pitschen uschè cun sieus flachs orandschs e sieu chaunt tipic es ün dals uschèls ils pü derasos in Svizra ed in gir in god ed üerts in tuot il pajais.

Sün invid da la Protecziun d'utschels Engiadina VSE refere-scha *Stefan Greif* da BirdLife Svizra sur dal gulacotschen. Il referat ho lö venderdi, ils 28 favrer, a las 20.00 illa chesa pravenda da Samedan. L'entreda es libra e que nun es necessari da s'annunzcher. (cdm/fmr)



Buna figura eir vi dal culöz d'üna vacha: La plumpa dals Padruns dürant la dschelpcha avant ün pèr ons.

FOTO MARTA PADRUN



La plumpa dals Padruns sarà documentada sün numerusas fotos dal Chal-andamarz a Lavin. Quia dürant il cortegi l'on passa (a dretta).

FOTO MICHELLE ZBINDEN